

RADUNANZA CUMÜNELA

106. Protocol dals 30-08-2023 - 20.15 h

Il president cumünel, sar Romeo Cusini, po salüder 40 persunas cun dret da vuscher a la radunanza cumünela illa Seletta da la scoula primara Zuoz.

In sieus plets d'introducziun bivgnainta el spzielmaing la rapreschantanza da las medias. Impü manzuna il president a duonna cusgliera Alexandra Blumenthal e sar cusglier Jachen Delnon scu nouv saramantos a lur prüma radunanza cumünela scu commembra e commember dal cussagl cumünel.

Il president cumünel constata cha l'invid cullas tractandas per la radunanza cumünela es gnieu tramiss tenor constituziun. Cunter la glista da tractandas nu do que üngünas objecziuns our dal ravuogl da la radunanza.

Scu scrutinaduors vegnan numnos e tschernieus per la vart vers il Piz Arpiglia sar Roman Grossrieder e duonna Lucrezia Magni per la vart vers il Piz Viroula e la maisa dal cussagl. Il president gratulescha per la tscherna onurifica.

622 01 Organisaziun da vschinauncha
 01.C Radunanza cumünela
 01.D.01 Approvaziun protocol

1. Protocol da la radunanza cumünela dals 28 gün 2023

Il protocol da la radunanza cumünela dals 28 gün 2023 es sto publicho vi da la tevla naira e sülla pagina d'internet da la vschinauncha dals 4 lügl 2023 fin ils 5 avuost 2023. Ils votants e las votantas haun temp 30 dis düraunt il temp da publicaziun per inoltrer eventuels recuors cunter il protocol. Siand cha que nu d'eira il cas vela il protocol automaticaing scu accepto. Il president ingrazcha al chanzlist per la cumpilaziun.

623 19 Bains immobigliers cumünels
 19.B Edifizis publics
 19.B.02 Edifizis da scoula

2. Dumanda da credit – Occurrenza d'architectura per infrastruttura da scoulina e scoula in Plagnoula

Per la tractanda principela da quista radunanza cumünela surdo il president cumünel il pled a sar cusglier Lucian Schucan, depüto per scoulas e cultura. Sar Schucan spiega la situaziun da partenza a regard l'affer suottamiss. La Chesa dals Pestes, inua cha la scoulina es situada actualmaing, nu taundscha pü a las aspettativas odiernas. Scu exaimpel manzuna sar Schucan la logopedia, chi vain spüerta in localiteds a La Punt Chamues-ch, perche cha la scoulina e scoula da Zuoz nun ho a disposiziun avuonda localiteds. Cun ün stüdi da

potenziel ho il cussagl cumünel evaluo l'areal da Plagnoula scu lö ideel pel svilup da novas infrastructures per la scouline e scoula. Ulteriur ho il cussagl cumünel sclariu cun ün stüdi da fattibilitad las pussibilitads in Plagnoula. La varianta ideela sun localitads per la scouline e scoula sainza nouva sela polivalenta. Per localitads per oters adövers scu abiter e misteraunza nu basta in Plagnoula il spazi, que eir considerand il purtret da la vschinauncha e la situaziun dals chantunais. La varianta cha'l cussagl cumünel propuona es eir la varianta la pü favuraivla. Sün basa dal program da localitads da la varianta proposta dess gnir scrit oura l'occurrentza d'architectura. Quista vain premieda dad üna giuria chi exista da differents personas. Il cussagl cumünel es rapreschanto cun sar president cumünel Romeo Cusini, sar cusglier Lucian Schucan e sar cusglier Jachen Delnon. La magiurited da la giuria, definida tenor societad svizzra d'indschegners ed architects (sia), ho la rapreschantanza da l'art, dimena indschegners ed architects. Las personas sun sar Marco Giuliani, sar Göri Valär, sar Roger Schärer e sar Marc Loeliger. Scu experts cun vusch consultativa faun eir sar cusglier Cristian Ferrari e duonna Vanessa Roost-Monatsberger, mnedra da scoula, part da la giuria. Ils cuosts per l'occurrentza d'architectura sun calculos seguaintamaing:

- Organisaziun e realisaziun da l'occurrentza	CHF	12'000.00
- Models	CHF	16'000.00
- Onurarais per la giuria	CHF	31'000.00
- Premis ed acquisti	CHF	100'000.00
- Divers	CHF	6'000.00
- Impostas püvalur	CHF	12'705.00

- Total	CHF	177'705.00

Our dals cuosts calculos segua la dumanda da credit dal cussagl cumünel a la radunanza cumünela sur CHF 180'000.00. Il president cumünel s'ingrazcha tar sar Lucian Schucan per las explicaziuns ed evra la pussibilitad per dumandas our dal ravuogl da la radunanza cumünela.

Üna votanta dumanda zieva'ls motivs per na realiser üna sela polivalenta nouva in Plagnoula. Sar Lucian Schucan respuonda culs fats cha la sela existenta accumplescha las pretaisas actuelas e ch'üna nouva sela polivalenta vess da gnir construida pü granda scu l'existentia, che chi fess darcho gnir stret in Plagnoula. Impü es que eir üna dumanda dals cuosts, chi füssan considerabelmaing pü ots. Il president cumünel agiundscha cha la sela existenta nun es me steda a discussiun, però gnida pigliada sü illa discussiun da las differents variantas i'l stüdi da fattibilitad.

Ün votant dumanda scha localitads per üna canorta sun eir stedas ponderedas. Sar Lucian Schucan po affirmer cha localitads per üna canorta, scu eir per oters adövers scu abiter e misteraunza, d'eiran part da las examinaziuns. Our da motivs da piazza nun es que però pussibel.

Ün votant voul savair scu cha la vschinauncha vo intuorn culla perdita da parkegis in Plagnoula tres ün fabricat per infrastruttura da scoula. El es da l'avis cha parkegis sun centrel per la vita in vschinauncha. Sar Lucian Schucan po respuonder cha'l cussagl cumünel ho già piglio sü quist punct ed es illa planisaziun per ün ingrandimaint dal Parkegi Centrel. Il president cumünel agiundscha cha quist tschegn vain piglio incunter e discuto cun üna perspectiva generela.

Sün dumanda dad ün votant precisescha sar Lucian Schucan, che chi'd es managio cun „locals per terz" illas visualisaziuns. Que's tratta da localitads per spüertas scolasticas, chi vegnan spüertas da terz, scu per exaimpel musica e religiun. Il president cumünel repetta cha'l spazi nu lascha tiers dapü scu localitads per la scouline, la scoula e la spüerta scolastica tres terz.

Ûn votant remarcha cha la disposiziun da las impostas sülla püvalur es dad adatter a las novas directivas.

Zieva chi nu vain pü giavüscho il pled our dal ravuogl da la radunanza cumünela cuntinua il president cumünel culla votaziun. El dumanda la radunanza cumünela per ün credit da CHF 180'000.00 per realiser ün'occurrentza d'architectura per infrastruttura per scoulina e scoula in Plagnoula. La radunanza cumünela aderescha unanimamaing a la dumanda da credit.

624 01 Organisaziun da vschinauncha
 01.C Radunanza cumünela
 01.C.05 Infurmaziuns
Orientaziuns

Il president cumünel spordscha scu prüm üna resposta sün üna dumanda our dal ravuogl da la radunanza cumünela dal favrer 2023 a regard il fabricat dad ün nouv restorant i'l edifizis sülla muntagna da la staziun dal vegl runel Albanas. Il president po infurmer cha la fabrica d'eira suottamissa al reguler proceder da permiss da fabrica dadour la zona da fabrica. Il permiss chantunel ed eir quel cumünel sun avaunt maun. Intaunt es eir entreda la dumanda per ün permiss gastronomic.

Cussagl cumünel: il president orientescha sur da la constituziun dal cussagl cumünel chi'd es in vigur daspö la saramantaziun dal nouv president cumünel, da la nouva commembra ed il nouv commember in lügl da quist an. Scu vicepresidenta per l'an da gestiun 2023/24 ho il cussagl cumünel tschernieu a duonna cusgliera Ladina Tarnuzzer. Il scumpart dals decasteris guard'oura seguintamaing:

DECASTERI	DEPÜTO	SUPPLEANT
Administraziun, persunel, sandet e provedimaint sociel, sgürezza publica	Romeo Cusini	Alexandra Blumenthal
Finanzas, economia publica	Jachen Delnon	Lucian Schucan
Scoulas, cultura	Lucian Schucan	Jachen Delnon
Turissem	Ladina Tarnuzzer	Romeo Cusini
Fabricas, planisaziun, ambiaint ed energia	Alexandra Blumenthal	Cristian Ferrari
Trafic public, digitalisaziun, im-mundizchas, agricultura, alps, pas-culs e gods	Flurin Wieser	Ladina Tarnuzzer
Vias, provedimaint d'ova, chanalisaziun, igluminaziun, stabels cumünels	Cristian Ferrari	Flurin Wieser

Bouda in Purschigl: A maun dad ün pêr fotografias muossa il president cumünel la dimensiun da la bouda chi'd es gnida giò illa Val Purschigl in lündeschdi. As vezza ils dans sülla piazza da golf, ma eir vi da la via champestra ed il let dal oriund ovel. El drizza ün sten grazcha fich a las persunas ed instituziuns chi sun stedas sül lö per las imsüras d'urgenza: sar Thomas Pinchera, mneder tecnic da la vschinauncha, la gruppa da lavur dal servezzan tecnic, ils pumpiers, sar cusglier Cristian Ferrari scu depüto ovas, famiglia Schucan pel proviant spontan, las dittas Rocca + Hotz AG, Zuoz, e Bagger Cello GmbH, Zernez e l'uffizi chantunel da god e prievens da natüra.

Plazza da scoula e tualetta publica: il president cumünel orientescha cha'l cussagl cumünel ho decis our da motivs da logistica ed our da la perspectiva da finanziaziun da metter insembel ils duos progets da la nouva piazza da scoula e las tualettas publicas i'l plaun suotterraun da la veglia scoulina. El spiega a maun dals plans actuels la realisaziun da la piazza da scoula e da las tualettas publicas. Las lavuors vegnan instradedas zieva Pasqua 2024.

Üna votanta es da l'avis cha la sortida dal Parkegi Centrel i'l üert da baselgia füss eir ün bun lö per tualettas publicas. Il president cumünel piglia incunter il tschegn.

Svilup areal Staziun: Zieva cha, our da differents motivs, nun es üna pezza pü capito bger, po il president cumünel infurmer cha s'ho darcho piglio sù ils discuors culla Viafier Retica per cuntinuer in chosa. Que vo per svilupper e sur elavurer progets existents, eir la finanziaziun da tels.

Repars da lavinias Albanas: il president cumünel infurmescha cha las lavuors d'indschegner per l'etappa 3 sun gnidas surdedas al indschegner Nicolo Pitsch da Ftan, chi ho fingià planiso las prümas duos etappas.

Ün votant dumanda scu cha que guard'oura cun ün proget da fotovoltaica süls repars dad Albanas. Il president po infurmer cha'ls sclarimaints in merit sun curraint e coordinos cullas examinaziuns per l'implaunt planiso a Samedan. La sfida a Zuoz es la lingia per purter l'energia guadagnada giò da la muntagna. Dalum cha'ls resultats sun avaunt maun infurmescha il cussagl cumünel.

Sunteri: Il president infurmescha cha las lavuors per las novas fossas dad urnas sun in cuorsa e bain avanzedas. El remarcha impü cha la direcziun da la vschinauncha ho piglio a maun pü decis il mantegnimaint dal sunteri.

Sanaziun radon e tet da la scoulina veglia: Tenor infurmaziun dal president cumünel sun las lavuors realisesdas aint il ram dal preventiv.

Hotel Botta: Saviand cha l'hotel nun es fabrico a fin, infurmescha il president cumünel cha'l cussagl cumünel es in contact cul proprietari da l'hotel e'l advocat dal proprietari. Il böt es dad elavurer soluziuns per rajiundscher l'avertüra da l'hotel. Üna data nun es però cuntschainta.

01.C Radunanza cumünela
01.D.02 Varia
Varia

Ün votant dumanda scu cha la situaziun a regard ün lej da bagner ed innaivamaint sün Pizzet/Chastlatsch es. Il president cumünel po infurmer cha la situaziun nu's ho sviluppeda, es però tractandeda a la tschanteda dal cussagl cumünel dals 13 settember 2023.

Siand cha nu vain pü dumando il pled ingrazcha il president cumünel a las votantas ed als votants per la cumparsa e per la buna discussiun. El serra la radunanza a las 21:15h ed invida tuot las preschaintas ed ils preschaints ad ün aperitiv chi segua a la radunanza cumünela in Seletta.

In buna fè

il president

l'actuar

Data da publicaziun:
Zuoz, ils 6 settember 2023